

## غربة إنسان

الحرف مع الحرف بينقش

لنا كلمه

وكلمه تجري ورا كلمه

ترسملنا جمله

وجمله مع جمله

تبقى كتاب

يمكن يكون فرح

أو يكون عذاب

صفحات ودائره بينا

فيها الألم

وتايهه جواها أمانينا

باب للندم

وباب من عدم

وسقطت من أوراقها أسامينا

والنسيم ماعاد نسيم

دخانه بيعمينا

والقمر اللي كنا بنحكي له أسرارنا

مطايق يبصلنا

ولا يسمع أغانينا

والليل كان بيحضن أحلامنا

بقي سجان يجلدنا ويشقينا

وعلي أبوابه يصلبنا ويدمينا

والنجم اللي كان بيونسنا

ف السما

هرب وإختفي

وحلف مايضوي في ليالينا

والشمس بعدت وبعدت

وتركت نارها تحرق فينا

كتاب...والمفروض إكون فيه إنسان...؟

لكن ضاع فيه إسمي

عائش غربتي

حتي مع جسمي

ضاع وسط البشر رسمي

ولا بلاقي اللي يسمع لهمسي

واخدانا دمعه

شايه معاها نظره

تاھت مع بكره

صار الجنون عنوان

عزفنا الحزن ألحان

غرقنا في بحر

بلا شيطان